

## UN GRANT PARTÎT POPOLÂR

*Cjâr Diretôr,*

*in merit al nestri sfuei, che lu lei sinpri vultintâr, o vores digj une me inpinion.*

*Ce ch'al à scrit sot elezions al è stât avonde clâr par cui ch'al veve voe di capîle ma tocje ancje tignî cont di tante int che no à capît fin dapît l'importancie che il Friûl al vebi contaz cui popui ch'a vivin chenti e che àn i nestris edentics problemas, tipo il Trentin-Sud Tirolo, tant par fâ un esenpli. Si à di bati e torna a bati su lis resons di storie, gjeografie, culumie e cetera ch'ò vin in cumunion plui che no cu l'Italie. E ancje al sares di dî che chî di nô o vin une leç elettorâl difarent che in altrò, a nestri danp.*

*Il sfuei, po, amancul une part al vares di tratâ sinpri problemas di fonde de nestre tiere: rinboschiment, sciavitûz militârs, sistemazion des aghis, latariis turnariis ch'a van sconparint, inpegno dai studenz e disocupâz te ricostruzion, centris storics di tornâ a comedâ o a fâju sù, no lassâ che il stât o i siei argagns a finissin di gjavânus chel pôc di furlan che nus è restât... Al vares ancje di sclarî fin dapit che il MF j tocje tornâ a viodi i siei programs di fonde, ganbiant il mût di fâ e ancje plui di cualchidun ch'al è dentri par fufignâ e messedâ. E jè une matetât d'ingrisulâsi che un moviment furlan al pensi di fâ furtune cul dâsi une ande di çanpe... Bastares pensâ 'es resons dal nestri cûr, 'e nestre 'speriense di popul, al ecuilibri (cualchi volte ancje masse!) che nol ûl savênt di stranbetâz estremistichis. Cui ch'al morose cui çanpiz, ca di nô, al pues fâlu dome par ignorance o par pojâ il cûl sun tune cjadrè.*

*Par finî, ores dîsj che in Friûl a son dutis lis pussibilitât di fâ nassi un dai plui granc' partîz popolârs autonomistics de Europe. Baste no fufignâ, e chest bisugne d'îlu fûr dai dinc' cence pore.*

*Mandi.*

*Nereo*

La So letare e tocje tanc' di chêi cantîns che bisugnares fâ un libri. O cirarai di contentâlu pa la miei.

Riguart a di chêi che àn votât, l'agrât e la ricognossince pratiche si palese plui che su lis peraulis, cirint di sconbati pe lor e pe nestre idèe di un Friûl plui libar, plui net e plui furlan. Ancje in merit dai cunfinanz, dacordo il cent par cent. O vin plui parentât cun lôr che no cui sicilians, che no nus vegnin nuje. Par chel, come ch'al à dit il

pape su la Marmolade, il «nestri jutori al ven des monz», d'in sù, no par in jù.

Pal MF no nus tocje a nô di lâ a petecâ in cjase di cheâtris. Nô o podìn dî la nestre, nude e crude, e podopo ognun ch'al fâsi i siei konz. Tant plui che il MF cumò al sta dant dongje il congres. Starìn a viodi se la int si lassarâ parâ atôr tanche macacos e se varâ il coragjo, par une volte, di dîur un biel no a di chêi che le stan sassinant. O soi dacordo su la çanpe; e jè une matetât, come la giostre. Si à di sei prin di dut furlans; daspò si viodarà colp par colp. Une «real-politik» plui che une «ost-politik» o politiche da l'ostie.

Sul fat dai argomenz ch'al vares di tratâ il sfuei ogni volte, Lu cjapi in peraule. Lui ch'al è un omp competent in tantis robis, che nus mandi un biel lavorut e J al metarìn in prime pagine.

Par cumò, plui che lâ a sgarfâ tal gjespâr dal Moviment Friûl, al sares plui just meti in moviment il Friûl prime ch'al seti masse tart. La So sperance, di un fuart partît popolâr dai Furlans, e jè ancje la nestre. Dome che, come ch'al bateve il vecjo Marchi, «il Friûl al à dibisugne di Furlans», no di pajassos o di baretis.

Mandi e ogni ben.

Setembar 1979